

Minister Otmar Oduber a mustra su sosten total

Korteweg, un proyecto cultural cu ta reuni artistanan local den un ambiente placentero

Cultura den tur su ramonan ta hayando hopi atencion na e momentonan aki y esaki ta wordo sinti tambe dor di diferente di nos artistanan local.

Un di nan ta Ricardo Teverden conoci como Cado de Lannoy, artista di fotografia y un di e organisadonan di e proyecto cultural Korteweg. E proyecto aki ta encera cu ta reuni artistanan local na un espacio, especificamente na Korteweg (un zijstraat di Caya Betico Croes), unda nan ta bende nan produccionan local den un ambiente hopi placentero cu tanto local como turista ta disfruta di dje. E idea a cuminsa danki na e iniciativa di Minister Otmar Oduber y ATA pa bin cu shopping night combina

cu aspectonan cultural den nos Caya Grandi. A traves di Ministerio di Cultura Cado a haya sa cu tin oportunidad pa artistanan local presenta nan obra y nan a haci esaki tambe. Cado a sinta den e reunion cu Minister Oduber tabatin cu comerciantenan recientemente pa evalua e proyecto di Fiesta den Caya unda a ripara cu tabatin espacio pa bin cu arte local durante e anochi aki, incluyendo snacks local, articulonan traha di cadushi y hasta te di flor pa atrae local y turista.

E concepto ta cu tur cos ta traha den manera 'upcycle' cu 'pop-up stands' traha di palet. Idea ta pa yega setup y despues piki di biaha, es decir, no ta laga nada atras y e luga ta keda limpi. E prome



biaha nan a set up cu 6 artista cu nan 'pop-up stands' y mirando e exito cu nan tabatin, nan a ripiti esaki na un manera mas grandi cu mas di 15 artista presente. Deseo a pa yega na un total di 20 artista unda cu tin rotacion y cada luna por bin artista nobo pa tur hende por haya oportunidad di presenta nan obra den

publico.

E plan inicial di e proyecto Korteweg tabata pa ta presente tur diabierna, pero e ta un poco dificil mirando cu ta trata di obranan traha na man. Dor di esey a tuma e decision pa haci un biaha pa luna. Na Korteweg ta haya diferente tipo di artista, entre otro, fotografonan, esunnan



cu ta traha tas na man, un señora cu ta traha pochi di lodo kima den tera mes, artesananan pinta riba driftwood y mas.

Ministerio y Departamento di Cultura ta sosteniendo e grupo aki cu e localisacion, pa wak con por haci di Korteweg un 'art street' un caya di arte na un forma permanente. Banda di esaki hunto cu Ministerio di Cultura ta bay traha pa haya un plataforma pa traha un luga permanente pa artista local por presenta nan obranan.

Mirando maneho di Minister Otmar Oduber y di Gobierno pa haci di San Nicolas e capital cultural di nos isla, Cado de Lannoy a bisa cu como artista nan ta wak e parti aki como e ciudad cultural di Aruba y nan lo desea di presenta eynan tambe. Nan kier bay haci Korteweg na San Nicolas tambe, aunque ainda no a defini e luga specifico, Cado ta sigur cu e evento aki lo ta uno exitoso combina cu Carubbian Festival. □

